



Zaithyel Soekandar a core su prome careda contra holoshi durante di e Weganan Sur Americano na Chile



ORANJESTAD -- Diasabra merdia, un otro hoben di Aruba mester a bini den accion den e Weganan Suramericano na Santiago de Chile ora el a competi den e asina yama careda contra holoshi den ciclismo BMX. E hoben Zaithyel Soekandar a core su prome competencia oficial como elite contra di un profesional di henter e continente Sur Americano. Pesar di tabata e mas hoben entre e diesocho coredonan elite, e hoben Soekandar cu su 16 aña di edad tabata determina pa haci un bon papel den e careda contra holoshi, cual tabata algo nobo pe. Mester bisa cu e organisadonan di e Weganan Suramericano a uza e sistema di careda contra holoshi pa asina aloca e diferente gruponan den e competencia mes cu lo tuma luga diadomingo. E biah a dicidi di otorga medaya na e prome tres miho temponan cori.

Den e careda contra holoshi, e hoben Soekandar ta marca un tempo di 35.905 seconde riba e pista di Parke Peñalolen, cu e tempo marca Zaithyel a termina na di 14 luga. Dos eror tecnico durante di su recorido a pone Zaithyel perde algun seconde, cual den e deporte di BMX ta mortal. Cada eror cometi ta pisa na final. Entre e posicion number 14 di Zaithyel y e number 3 di Brazil tin un diferencia di 1 seconde. Asina mes su coach Pedro Estaba a bisa di ta contento cu e resultado final. □

